

光緒江西通志

江西通志卷一百七十七

寓賢

周

澹臺滅明武城人字子羽狀貌甚惡欲事孔子孔子以爲材薄旣已受業退而修行行不由徑非公事不見卿大夫南游至江從弟子三百人設取予去就名施乎諸

侯

史記

白志舊案子羽墓有三一在泰山南武城縣一在陳留裘氏鄉一在豫章東湖上其中必有一誤

宋程大昌友教堂記云後世去古聖賢絕遠旣無所事畏亦無所有諛而爭獵以自夸耀於是有一事而彼此互相同者使人慕尙如此無乃聖賢之澤久而不泯也歟其亦民之秉彝無古今而好是懿德也歟則其僞也乃其所以爲可尙也況今之疑未必非昔之信者歟今豫章不獨有祠墓兼有澹臺門用仍舊志以弁寓賢之首

慶忌吳公子驟諫吳子曰不改必亡弗聽出居於艾

注杜

艾吳邑豫章有艾縣

遂適楚聞越將伐吳冬請歸平越遂歸欲除

不忠者以說於越吳人殺之左傳

漢

許劭字子將汝南平輿人少峻名節好人倫多所賞識  
司空楊彪辟舉方正敦樸皆不就或勸劭仕對曰方今  
小人道長王室將亂吾欲避地淮海以全老幼乃南到  
廣陵徐州刺史陶謙禮之甚厚劭不自安告其徒曰陶  
恭祖外慕聲名內非真正待我雖厚其勢必薄不如去  
之遂復投揚州刺史劉繇於曲阿其後陶謙果捕諸寓  
士及孫策平吳劭與繇南奔豫章而卒後漢書

晉

鄭袤字林叔滎陽開封人高祖眾漢大司農父泰揚州

刺史有高名表少孤早有識鑒荀攸見之曰鄭公業爲不亡矣隨叔父渾避難江東時華歆爲豫章太守渾往依之歆素與泰善撫養表如己子年十七乃還鄉里景元初拜光祿大夫封密陵侯

晉書

衛玠字叔寶河東安邑人年五歲風神秀異及長有盛名辟命屢至皆不就久之爲太傅西閣祭酒拜太子洗馬兄瑛爲散騎侍郎內侍懷帝玠以天下大亂欲移家南行母曰我不能舍仲寶去也玠啟諭深至爲門戶大計母涕泣從之臨別玠謂兄曰在三之義人之所重今可謂致身之日兄其勉之乃扶輿母轉至江夏玠妻先亡征南將軍山簡以女妻焉遂進豫章是時王敦鎮豫章長史謝鯤先雅重玠相見欣然言論彌日敦謂鯤曰

昔王輔嗣吐金聲於中朝此子復玉振於江表微言之緒絕而復續不意永嘉之末復聞正始之音何平叔若在當復絕倒玠嘗以人有不及可以情恕非意相干可以理遣故終身不見喜愠之色以王敦高爽不羣而好居物上恐非忠臣求向建鄴京師人士聞其姿容觀者如堵玠勞疾遂甚永嘉六年卒時年二十七時人謂玠被看殺葬於南昌謝鯤哭之慟人問曰子有何恤而致斯哀答曰棟梁折矣不覺哀耳咸和中改塋於江甯晉書寓白志舊案郭子章云叔寶東晉名流一統志南昌流寓不載特爲補之又云玠以永嘉六年五月六日至豫章其年六月二十日卒此則玠之南渡豫章四十五日豈暇至都下而亡乎且諸書皆云玠亡在豫章不云在都下也玠葬南昌城許徵君墓東

范宣字宣子陳留人年十歲能誦詩書嘗以刀傷手捧

手改容人問痛邪答曰不足爲痛但受全之體而致毀傷不可處耳少尙隱遁加以好學手不釋卷以夜繼日遂博綜眾書尤善三禮家至貧儉躬耕供養親歿負土成墳廬於墓側太尉却鑒命爲主簿詔徵太學博士散騎侍郎並不就家於豫章太守殷羨見宣茅茨不完欲爲改宅宣固辭之庾爰之以宣素貧厚餉給之宣又不受宣雖閑居屢空常以誦讀爲業譙國戴逵等皆聞風宗仰自遠而至諷誦之聲有若齊魯著禮易論難皆行於世

晉書

唐 吳南唐坵

權皋字士絲秦州略陽人祿山反天下聞其名爭取以爲屬永王舉兵勦士大夫舉詭姓名以免元宗在蜀聞

之拜監察御史會母喪得風痺疾客洪州浙西節度使  
顏真卿表爲行軍司馬召拜起居舍人固辭嘗曰吾潔  
身亂世以全吾志欲持是受名邪李季卿爲江淮黜陟  
使列其高行以著作郎召不就自中原亂士人率渡江  
李華柳識韓洄王定皆仰鼻節與友善卒年四十六洄  
等制服行哭詔贈祕書少監元和中諡貞孝

豫章書

張甯字康叔洛陽人登進士授相王府司馬擢御史大  
夫與陸贄韓愈友善德宗建中閒升國子監祭酒立朝  
嘗諤忤盧杞因棄官慕柳渾高風聞其隱於武甯山遂  
訪渾遺蹤入紫鹿岡青牛洞慨然止曰紫鹿青牛非方  
外人不可狎遂隱居於此

武甯縣志

曹松字夢徵舒州人學賈島爲詩依建州李頻頻卒值

寇亂避地洪州西山唐昭宗光化四年禮部侍郎杜德祥榜及第時年七十偕第者歛人王希羽亦年七十餘及京兆劉象閩人柯崇鄭希顏皆年六十餘號五老榜值上新平內難開放新進士喜甚詔選中有孤寒者以名聞特敕授官故德祥以松等塞詔授校書郎

姓源珠璣

徐延休字德文會稽人唐乾符進士昭宗出奔石門求學士草詔不可得延休適以調官來京師亦避地居旁近逆旅左右有知其工文詞者言於上卽召見命視草善之及還長安不得用梁蔣元暉辟爲其佐延休棄去依鍾傳於洪州吳取江西仕至光祿卿江都少尹卒遂

家廣陵

陸游南唐書

陳陶字嵩伯世居嶺表以儒業名家陶挾策長安聲詩



歷象無不精究昇元中至南昌將詣建康聞宋齊邱秉政自料與齊邱不合乃築室西山日以詩酒爲事會齊

邱出鎮南昌陶志不屈而齊邱亦不爲之薦

南唐書

潘承祐字乾休晉安人仕吳爲光州司法參軍郡有大獄羣吏不直承祐固爭之不得因棄官歸閩嶺及王氏據閩仕至大理少卿王延政鎮建州辟爲度支判官延政與福州構隙承祐極諫不納及延政僭號以爲吏部尙書而用其幸臣楊思恭爲僕射承祐復爭遂逐歸私第查文徽下建州以禮致之元宗以爲衛尉少卿遷鴻臚卿委以南方之事升降人物制置郡縣多用其言薦陳誨林仁肇皆著功效老病乞骸骨以禮部尙書致仕

卒於洪州西山

南唐書

鍾蒨字德林隨兄懷建家豫章屬辭敦行純有時譽起家瀋府從事累登臺郎遷集賢殿學士後主時官勤政殿學士宋師入金陵蒨朝服坐於家兵及門舉族死之

十國

春秋

徐鍇字楚金延休子四歲而孤自能知書中主璟奇其文以爲祕書正字累官內史舍人兄鉉注說文鍇亦成繫傳四十卷又以四聲韻編次爲說文篆韻譜十卷鉉使宋鍇憂懼而卒年五十五當時重其文章比之二陸

陸游南

唐書

宋

徐鉉字鼎臣延休子十歲能屬文仕吳爲校書郎又仕南唐李昇父子試知制誥與宰相宋齊邱不協貶泰州

司戶接俄復舊官璟死事其子煜爲禮部侍郎歷尚書右丞宋師圍金陵遣鉉求緩兵時煜將朱令贇將兵來援煜以鉉旣行欲止令贇勿令東下鉉曰此行未保必能濟難江南所恃者援兵爾要以社稷爲重豈顧一介之使置之度外可也煜泣而遣之及至雖不能緩兵而入見辭歸禮遇皆與常時同及隨煜入覲太祖責之聲甚厲鉉對曰臣爲江南大臣國亡罪當死不當問其他太祖歎曰忠臣也命爲太子率更令淳化二年廬州女僧道安誣鉉姦私下吏道安坐不實抵罪鉉亦貶行軍司馬卒年七十六鉉無子門人鄭文寶護其喪至汴胡仲容歸其葬於南昌之西山有文集三十卷

宋史

李夤建安人有清節仕江南李氏至諸司使宋初授官

不拜舉進士爲衢州司理參軍以母在江南棄官歸後其子虛己亦舉進士通判洪州迎負至豫章樂其山水曰此可以終吾身也遂於東湖築第以居并建涵虛閣平生喜爲詩與子壻晏殊唱酬有雅正集二十卷行世

林志

李積中四會人元豐進士爲御史敢直言元祐中司馬光秉政罷新法積中力贊其議歷翰林直學士後蔡京爲相黜元祐諸賢凡二百九十人積中與焉因徙家於

洪州後裔安國大性大異大東俱知名

府志

邵成章欽宗朝內侍也建炎初上書論黃潛善汪伯彥誤國之罪帝怒除名南雄州編管侍御史馬仲言成章緣上書得罪今是何時以言爲諱久之帝思成章忠直

召赴行在其徒忌之譖於帝曰邵九伯來陛下無歡樂  
矣遂止之於洪州金人入洪問其名訪求得之謂之曰  
知公忠正能事吾主可坐享富貴成章不應脅以威亦  
不從遂釋之曰忠臣也吾不忍殺遺之金帛而去宋史

蘇雲卿廣漢人紹興閒來豫章東湖結廬獨居待鄰曲  
有恩禮無良賤老稚皆愛敬之稱曰蘇翁身長七尺美  
鬚髯寡言笑布褐草履終身不易披荆畚礫爲圃藝植  
耘芟灌溉皆有法度蔬視他圃尤勝夜織履堅韌過草  
屨人爭賀之少與張浚爲布衣交浚爲相馳書函金幣  
屬豫章帥及潛曰余鄉人蘇雲卿管樂流亞迺迹湖海  
有年矣近聞灌園東湖其高風偉節非折簡能屈幸親  
造其廬必爲我致之帥潛密物色曰此獨有灌園蘇翁

無雲卿也乃屏騎從更服爲游士入其圃翁運鋤不顧  
進而揖之翁曰二客何從來邪延入室土銕竹几地無  
纖塵案上有西漢書一冊二客恍若自失默計以爲蘇  
雲卿也遂叩其鄉里徐曰廣漢客曰張德遠廣漢人翁  
當識之曰然客又問德遠何如人曰賢人也第長於知  
君子短於知小人德有餘而才不足因問德遠今何官  
二客曰今朝廷起張公欲了此事翁曰此恐怕他未便  
了得在二客起而言曰張公令某等致公共濟大業因  
出書函金幣寘几上雲卿鼻閉隱隱作聲若自咎歎者  
二客力請共載辭不可期以詰朝上謁且遣使迎伺則  
扃戶闐然排闥入則書幣不啟家具如故而翁已逝竟  
不知所往矣帥漕以其狀復浚浚拊几歎息作箴以自

賈曰雲卿風節高於傅霖予與之期共濟當今山潛水  
沓邈焉莫尋弗力弗早予罪曷鍼宋史

宋自遜字謙父別號壺山居士金華人徙居南昌父子

兄弟皆能詩而謙父尤著當代名流皆敬愛之方虛谷  
亟稱其殘年日易晚夾雪雨難消之句所著有詩餘名

山樵笛譜安志

元

伍良臣元濟陽王甥嘗爲撫州路經歷至正閒避地於  
進賢縣崇信鄉雖屬懿親退然如布衣致力經籍從事  
翰簡有詩若干卷題曰中流一壺又編通鑑纂要補論

見聞錄府志

明

孔叔賢先聖五十七世孫父希魯官廬陵值元季道不通歿於官叔賢留寓南昌之新吳家焉子二長斯誠次

斯聞皆卓立有成人行

梁混坦庵文集

伍伯遜汀州甯化人徙居南昌與弟伯陽伯達並力學敦信義同居數百口雍睦無閒胡祭酒儼深嘉重之子恆受業吳聘君之門景泰閒應賢良詔以親老辭不赴終養於家

林志

謝復字一陽祁門人聞吳與弼倡道棄科舉業從之游身體力行務求自得居家孝友喪祭冠婚悉遵古禮或問學曰知行並進否則落記誦訓詁矣晚卜室西山之麓學者稱西山先生

白志

蔣杰字美居其先普安人數傳至杰登萬厯己丑進士



授戶部主事歷郎中抗疏請視朝極言晏安中隔之弊  
留中不報知南雄府擢副使以內艱歸崇禎閒子克顯  
任上高令解組爲奉親避地之計遂徙居豐城著九經  
選鈔十七史摘要邊略議治河議略式穀堂集息園小  
草靜寄軒稿南遊日錄東遊漫草紀遊小草武陵晤語  
普安續志

白志

### 國朝

陳上善字元永蘇州人博學好古以詩名海內兼工篆  
隸僑居東湖去榆墩不數十武與萬時華陳宏緒徐世  
溥相友善遭亂家破子身窮老經奇卓犖之致一發於  
詩所著有山居詩及適餘堂集

施閏章集

吳雯炯字秋鏡歙縣人家南昌蓼洲少有詩名與廬山

郡立學世亨悉力營建以疾革遂家焉後累贈通議大

夫

林志

劉次莊字中叟長沙人熙甯進士官殿中侍御史博洽  
淹貫詞翰絕倫元祐中謫居新淦築室東山寺前俯瞰  
清流自謂有濠梁閒趣因號戲魚翁時稱爲高師今縣

東有高師湖以次莊得名

林志

王覲字明叟泰州如皋人第進士爲右正言右司諫極  
論罷章惇蔡確韓縝張璪又劾竄呂惠卿紹聖初以寶  
文閣直學士知成都徙河陽貶少府少監又貶鼎州團  
練副使徽宗卽位還故職知永興軍過闕留爲工部侍  
郎遷御史中丞改翰林學士日食四月朔帝下詔責躬  
覲當制有惟德弗類未足以當天心之語宰相去之乃

力請外以龍圖閣學士知潤州徙海州罷主管太平觀

安置臨江軍卒紹興初追復龍圖閣學士

宋史

許奇字彥國開封人以蔭補太醫院判建炎中孟太后

如虔奇扈駕至新喻遂家焉所著有黃農隲緒

謝志

伍弼字國正甯化人紹興閒官御史出知洪州時秦檜

用事弼憤不能去力請致仕因占籍新喻之鳳池蕭詵

爲作歸休記

謝志

方信孺字季若興化軍人以父崧卿蔭補番禺尉韓侂  
胄舉恢復之謀諸將僨軍朝廷尋悔金人亦厭兵遣使  
講和召信孺赴都假朝奉郎充樞密院參謀通問於金  
至要以五事信孺曰反俘歸幣可也縛送首謀於古無  
之稱藩割地則非臣子所忍言至汴見左丞相宗浩辯

對不少誦授以報書還詔議所以復命眾議還俘獲罪  
首謀增歲幣五萬遣信孺再往金人猶執初議信孺固  
執不許宗浩計窮密與定約復命再差抵汴宗浩變前  
說有誅戮禁錮語信孺不爲動會蜀兵敗取散關金人  
益疑信孺還言敵所欲五事其五不敢言侂冑厲聲詰  
之信孺徐曰欲得太師頭耳侂冑大怒奪三秩臨江軍

居住

宋史

胡思誠字達孝澶州人寓居清江知安豐軍時羣盜剽  
掠無禁思誠悉擒之淮西諸司上其事除知濠州自號

浴溪居士著有浴溪集若干卷

林志

余彥忠字清心忠襄安道六世孫由邵武訪親至新喻  
遂家吟峯下淡退樂善不慕榮名刻勸善錄行世謝尙

書謬序之嘗自閩攜匠開書市以利後學起鐵冶以利

公家喻之紙戶蓋創於彥忠云

新喻縣志

趙孟濟字君用其先汴人寓居清江德祐中待次於家郡檄攝衛城邑未幾元兵攻城孟濟與總統丁應明閉譙門登樓椎鼓以張虛聲元兵越境去既而湖北潰兵與西勤王兵城南相持孟濟慨然入陣撫諭兩軍感泣解散以功授清江令明年元兵大至城陷死之初丁應明與孟濟同里沒於陣孟濟白諸郡以閩官其二子林志任詔字子嚴蜀人自爲令歷部使所至有政績後退居清江築圃山岡扁曰盤園建堂曰高風有盤園集高風

錄

林志

元

字木魯紳字子暈鄧之順陽人父居謙辟掾江西以家  
自隨生紳贛江舟中金鳴者三人以爲異紳稍長卽勤  
學父歿家漸落紳不恤而爲學益力乃自順陽復往江  
西從新喻蕭克翁學克翁夜夢大鳥止其所居翼覆軒  
外舉家驚異出視之冲天而去明日紳至紳始名恩溫  
字伯和克翁爲易今名字以夢故後復從京兆蕭剡游  
其學益宏剡以女妻之大德十一年用薦者授襄陽縣  
儒學教諭歷監察御史卒追封南陽郡公諡文靖

豫章書

國朝

阮蔡文字子章福建漳浦人父曰魁徙江西寄籍新喻  
補諸生康熙庚午登賢書數上春官不第留心經世所  
至南北山川阨塞險易沿海島澳及東南諸蠻夷情狀

利害齊語楚咻吳越閩廣方言苗瑶鴉鳩侏僂之音入其鄉卽肖其聲調口角莫能辨爲何方之人也與武人吳郡相善蔡文有族父拜興汀總兵官偕郡依之蔡文任書記郡爲小校未幾蔡文母沒遂挈家還漳浦與漳浦令陳汝咸爲講經之會巡撫張伯行亦雅重之值漳泉諸郡饑蔡文將赴江南傾囊以資族人謂其子曰吾非不念汝曹顧此皆同源共本者也脫二日不舉火非填溝壑甯免散之四方哉時吳郡已帥定海方奉

詔截江浙漕米三十萬石由海道入閩分賑蔡文急如浙分運

五萬石揚帆先至漳泉之人賴焉五十一年冬海賊陳尙義乞降陳汝咸時爲御史奏請自往招撫薦蔡文與俱偕千總駱南左其彪等入海颶風作舟人大恐蔡文

怡然曰我等爲

朝廷招逋寇靖海疆雖葬魚腹不猶愈死兒女子手邪至  
登萊易舟往成山蔡文直上賊艘見尙義開示威信聲  
情慷慨遂悉眾降敘功選雲南陸涼州知州未行改授  
福建廈門水師中營叅將一日紅夷互市者賈輕重不  
相中拔刀以譁蔡文單騎往縛譯榜之爲詳其直皆羅  
拜次日其酋率眾謝蔡文坐堂皇語以

朝廷威化悉還所獻儀物諸彝畏服調臺灣北路叅將北  
路地方千里半線以上民少番多大肚牛罵吞霄竹塹  
諸處山川奧鬱水土苦惡南崁淡水窮年陰霧罕晴霽  
硫黃所產毒氣薰蒸鄭氏以投罪人自設淡水防兵及  
瓜生還歲不能三之一巡哨未有至者蔡文決計往部



曲皆涕泣強諫蔡文曰不然臺雖彈丸實閭之安危淡水又臺之鍵鑰由淡水至福州利風一日可達民番錯雜亡命者日多不熟知其里道情形何以控制調度自齋帳落具脯糒日或於馬上成詩夜然燭紀所歷地里山溪風候土俗諸番具牛羊酒食迎餉道旁悉慰遣無所受召社學番童與之語曰我汝師也能背誦四書旌以銀布爲講君臣父子大義諸番皆感悅竟以中瘴病瘖遷福州副將赴京道卒於宿遷年五十蔡文平生無留錢凡在官二十四月未嘗取兵民一粒一絲沒後妻孥饑粥不充無一廛之宅

藍鼎元鹿洲文集  
以上臨江府

吳州

劉惇字子仁平原人遭亂避地客遊廬陵事孫輔以明

天官達占數顯於南土每有水旱寇賊皆先時處期無不中者輔異焉以爲軍師軍中咸敬事之號曰神明建安中孫權在豫章時有星變以問惇惇曰災在丹陽權曰何如曰客勝主人到某日當得問是時邊鴻作亂卒如惇言惇於諸術皆善尤明太乙皆能推演其事窮盡要妙著書百餘篇名儒刁元稱以爲奇惇亦寶愛其術不以告人故世莫得而明也

三國  
吳志

唐 南唐增

姚崇字元之陝州硤石人世傳崇父嘗宦蜀中崇從母留不去寄居永新縣北十里有臺曰聰明崇嘗舍其上其母墓今在縣治東舊學宮左崇歷官中書令諡文獻

豫章

書

牛僧孺字思黯涇州人祖仕唐爲幕職自交廣至郴衡  
閒爲山寇所掠惟僧孺母子獲存遂棲姚崇故趾母訓  
之學母終葬邑之西南禾川元和初第進士後官至中

書侍郎敬宗立封奇章郡公卒諡文簡

豫章書

舊案郭子章云

姚牛二公本傳並未序至吉州然一統志郡志俱詳載  
二母墓地不知何據考崇父懿爲廣州都督永新非入  
蜀之路何以云崇母留不去僧孺貶循州長史徙衡汝  
此是僧孺事而志云其祖仕唐自交廣至郴衡當必有  
誤今姑存之

傳疑可也

張德廣名敘青州人天復閒授節度推官累功封開國

男監丞新官滿因家之卒葬勝業鄉之金鼇山

謝志

尹濯汴州人仕唐廣平閒爲平南將軍累功封鄱陽侯

黃巢入廣詔改廣州刺史以靖其亂巢平留鎮洪州居

洗馬池朱温代唐旣據汴濯恥事二姓遂避地永新家

焉府志

劉儼字漢臣爲安福簿眷戀湖山之勝不忍去留家密

湖卒葬白馬峯府志

孟賓于字國儀連州輔國鄉人天福中自湖湘越京洛

應舉遠人無援遂卜命於華山神琰有如一年乞一琰

凡六擲得吉天福九年登第果六舉後往江南官至水

部郎中致仕居吉州玉笥山自號羣玉峯叟

郡開雅談

張翊其先世爲京兆人唐末翊父授任番禺屬劉隱將

據廣南棄官北還至潭衡閒馬氏已有潭澧挈家奔江

南過廬陵禾川僦屋居焉翊與弟惟彬善讀書克承先

業高祖時徐知誥輔國政翊入廣陵以射策中第授武

騎尉南唐禪代擢虔州觀察判官西昌令假道還廣陵

里人榮之翊文辭婉麗禾山大舜二如廟碑廬陵紫陽  
觀碑新興佛閣碑文皆翊所撰

十國春秋

宋

劉功甫會稽人寶祐中爲萬安令有惠政後卽居於邑  
之橫街

府志

胡洪範環州人寄居吉水西城咸甯閒星變以國學生  
應詔上書詆賈似道專權誤國似道怒欲置之死丞相

江萬里疏稱其無罪得釋歸卒

吉水縣志

路植河南人紹興閒爲安福令後遂家於邑之湖溪

府志

元

姜天祐字孝祥四川重慶人以父蔭補吉安路都稅使  
弟慶祥贅於仁壽鄉盧兜王氏遂家焉至正壬辰羣盜

蜂起與校書郎解子元大安羅啟南率眾拒寇遇敵敢

勇與子元力戰而死太守立忠義祠祀之

府志

李祁字一初茶陵人元末舉進士第二爲遼陽儒學提

舉元亡不復出寓居永新卒焉自號危行老人文章端

雅有希遠集若干卷

明一統志

明

單執禮順天宛平人洪武閒以御史謫吉水丞卒寓縣

之南坊

吉水縣志

王應電字昭明崑山人受業於魏校篤好周禮謂周禮

自宋以後各以己意更定然此皆諸儒之周禮也覃研

十數載先求聖人之心溯斯禮之源次考天象之文原

設官之意推五官離合之故見綱維統體之極成周禮

傳誥數十卷嘉靖中家燬於兵流寓泰和以其書就正  
羅洪先洪先大服翰林陳積昌以師禮事之卒於泰和  
積昌爲經紀其喪歸之崑山所著有經傳正譌同文備  
考書法指要六義音切貫珠圖六義相關圖等書行世

白志

王畿字汝中號龍溪浙江山陰人弱冠舉於鄉嘉靖癸  
未下第歸受業王文成守仁丙戌試期不欲往守仁曰  
吾非以一第爲子榮也顧吾之學疑信者半子之京師  
可以發明耳畿乃行中會試時當國者不說學故不廷  
試而歸戊子守仁卒於南安畿奔喪至廣信斬衰以畢  
葬事而後心喪壬辰授南京職方主事尋以病歸後遷  
至武選郎中在林下四十年無日不講學嘗與鄒文莊

守益羅文恭洪先會講青原考德問業一時稱盛

明儒學案

錢德洪字洪甫號緒山浙江餘姚人王守仁平濠歸越

德洪與同邑范引年管州等數十人會於天中閣同稟

學焉嘉靖五年成進士守仁征思田德洪與王畿承守

越中書院七年奔守仁喪至貴溪羣弟子議喪服德洪

曰吾夫子歿於道路無主喪者弟子不可以無服然德

洪有父母在麻衣布經弗敢有加焉築室於場以終心

喪十一年始廷試出爲蘇學教授歷遷刑部員外郎穆

宗朝進階朝列大夫致仕戊申與王畿赴青原復古會

後九年再至窮鄉邃谷田夫野老皆知有會莫不敬業

而安之

明儒學案

國朝



毛奇齡字大可浙江蕭山人宣城施閏章分守湖西延  
奇齡講學於白鷺洲書院與楚人楊洪才辨論諸經成  
白鷺洲主客說詩一卷

廬陵縣志  
以上吉安府

吳埏

丁奉字承淵廬江安豐人仕吳爲冠軍將軍封都亭侯  
計略過人能斷大事孫休時遷大將軍休薨奉與丞相  
濮陽興等迎立孫皓遷右大司馬左軍師有毀之者皓  
徙奉家於臨川

明一  
統志

晉

郭翻字長翔武昌人伯父訥廣州刺史父察安城太守  
翻少有志操辭州郡辟及賢良之舉家於臨川不交世  
事惟以漁釣射獵爲娛與翟湯俱爲庾亮所薦公車博

士微不就咸康末乘小船暫歸武昌省墳墓安西將軍  
庾翼躬往造翻欲強起之翻曰人性各有所短焉可強  
偏翼又以其船小狹欲引就大船翻曰使君不以鄙賤  
而辱臨之此固野人之舟也翼俯屈入其舟中終日而

去

晉書

南唐增

賈崇少勇果俗謂之賈尉遲事烈祖積官至侍衛都虞  
候元宗嗣立擢神武統軍東都屯營使周師未及境盡  
焚其井邑棄壘而歸元帝責其奔潰之由且曰朝野謂  
卿爲賈尉遲朕甚賴卿一旦敵兵未至棄甲宵遁何面  
目至此邪崇叩首言朱元旣叛大軍失律城孤氣奪無  
數旅以禦要害雖真尉遲亦無所施其勇惟陛下裁之

以忤旨釋罪長流撫州

十國春秋

宋

韓駒字子蒼蜀陵陽人獻文論補將仕郎累官直學士院詔撰樂章坐蘇氏黨奉祠尋復應召歷知江州致仕

寓居臨川卒

林志

許忻字子禮拱州襄邑人寓臨川初擢第蔡京當國欲妻以女忻曰非偶也紹興閒赴調趙鼎詢以世務條十弊以獻丐祠去尙書程瑀薦之召還時方議和忻極言不可後知邵州尊賢育才郡士嚮義及歸蕭然如昔閒

門讀書卒年五十六

府志

薛公采字元亮汝州葉縣人幼穎敏嘗問其外伯祖草堂先生曰已聞讀書之方未識行己之要草堂爲作十

戒十勉以示之嘗曰與其祿而蹈不測之機孰若舍位  
就安而甯吾親乎遂不仕潛心聖道作詩訓諸孫朱文  
公陸文安公皆爲之跋呂成公贊其像曰今衣冠古風  
節室如冰衾似鐵佩所聞稚暨耄見汲公無愧色卒葬

招仙山

林志

張澂字達明舒州人官至尙書右丞建炎南渡嘗宰臨

川遂寓居焉著有淡巖文集

臨川縣志

李璧字季章眉山人歷仕至參知政事有詩文士論以  
其文章伯仲葉水心詩詞輩行陸放翁晚遷於撫創峩  
峩書院聚書藏於閣有臨汝閒書五十卷

府志

尹塙字致道和靖先生之後以恩補江西茶鹽幹官寓

臨川遂入籍焉仕至金州倅卒

府志

林文仲字次章祖公選本閩清人爲瓊管安撫待次撫城因家焉登淳熙二年進士授常德府司法累仕至成

都漕政卒子正嘉定進士

府志

孫覲晉陵人宣和六年以尙書員外郎參詳貢舉被謫道臨川寓居宜黃作興造遷學諸記

府志

元

虞汲本蜀仁壽人允文之後父珪知連州以文學知名汲仕宋爲黃岡尉宋亡僑居臨川崇仁與吳澄爲友澄稱其文清而醇家貧教授後以翰林院編修致仕

明一統志

章巴延

原作伯顏

以左丞致仕居臨川平章政事道通

原作道童

討賊江西請署行省左丞至則專任調遣設禦敵之計乘閒出擊賊搏其營走之巴延之功爲多未幾以疾卒

臨川  
縣志

明

李貞字世貞山東蒲臺人初以才學舉任大名主簿改  
樂安操執清慎上官重之委任輒審於金谿城董役過  
勤卒於工次貧不能還遂占籍於明賢鄉

林志  
上撫州府

宋

張安石字伯起父侑金陵人康定中宰南豐卒於官貧  
不克歸因家焉安石不治產業不畜妻子居無童僕寄  
爨鄰家與人接貌不苟親言不苟從舉太學進士不第  
卒於京師曾文昭肇時在館閣致其骨歸里銘其墓曰  
孔子不得中道而與之欲得不屑不潔之士若伯起者  
其近是歟

豫章  
書

王義叔字夏卿鄭州人官至侍郎家南城紹興中行卒  
爲亂有撫定之功旰民德之建祠以祀其後裔華鏃皆

成進士

府志

吳潛字毅夫甯國人嘉

舊志  
誤泰

定十年進士第一紹定四

年都城火疏論六事所言率驗知建康府兼行宮留守

疏論保蜀之方護襄之策防江之算備海之宜甚難者

三事端平初應詔復陳九事忤時相復起厯戶工吏三

部尙書兼知臨安言皆嘉納淳祐十一年拜右丞相兼

樞密使開慶初乞骸未幾拜特進左丞相先是元兵渡

江賈似道在漢陽御史饒應子請移之黃州黃雖下流

實兵衝也似道以爲潛欲殺己銜之令御史沈炎劾潛

措置無方致全衡永桂皆破落職謫建昌軍

宏簡  
錄

陳蒙

本堂集  
字伯求

鄞縣人咸淳間爲太府寺主簿嘗入對極

言似道爲相國政闕失後爲淮東總領似道誣以貪汙

安置建昌軍籍錄其家

宋史陳垣傳  
綱目續編

謝堯仁字夢得建甯人徙居南豐卓絕奇詭有志當世  
而骯髒不自達寓情詩酒著有鹿峯嶺庵集子驛字處

厚亦能詩與舍人張孝祥友善

府志

元

王伯昭其先恆山人寓居南城學膽才雄聲稱藉甚大

江之右未能或之先也

宋潛溪恆山精舍  
記以上建昌府

唐

閻立本西安萬年人官中書令卜居武安山下讀書煖  
水三山之左置南莊五都自太宗殂高宗立權移武后



立本舍宅為普甯寺施讀書處為智門寺舍南莊為普  
圓禪院又築墓於普甯寺後委僧護守之府志

陸羽字鴻漸一名疾字季疵復州竟陵人拜太子文學  
徙太常寺太祝不就寓居信城北三里自號東岡子性

嗜茶環居多植茶因號茶山御史蕭瑜領洪州羽自信  
州移至洪州玉芝觀瑜喜與之唱和成帙權德輿為之

序豫章書 謹案陸羽又嘗至廬山謝志重見南康寓賢今刪正

呂珏歷城人父安國僖宗時為衢州刺史卒於官珏扶  
櫬歸過信州值黃巢兵亂奔永豐鎮得岑陽之勝因家

焉白志

俞稠歙州人唐時授睦州刺史過信州愛永豐之瑜山

遂徙家居其下白志

宋

楊億字大年建州浦城人祖文逸南唐玉山令億將生  
文逸夢一道士自稱懷玉山人來謁未幾億生七歲能  
屬文對客談有老成風太宗聞其名詔送闕下試詩賦  
五篇深加賞異卽授祕書省正字歷官翰林學士兼史  
館修撰判館事權景靈宮副使卒所著藉蒼武夷頴陰  
韓城退居汝陽逢山冠菴等集內外制刀筆共一百九

十四卷

宋史

詹復仁字仲仁崇安人景祐閒登進士第累官中憲大  
夫浙江副使金人犯闕遂奉親以歸徙居鉛山之永平

橋東崇義鄉

府志

葉澣字儁齊元符進士授大理寺評事本浙江處州籍

建炎初棄官隱弋陽縣南之遇春別號漁隱八子二十

一孫壽九十四卒葬於河潭大理卿周三畏誌其墓

府志

李彌大字似矩蘇州人崇甯進士履行端方爲一時之

傑累官至工部尙書後以顯謨閣學士致仕寓居於信

之懷玉山

宋史新編

馬永卿字大年揚州人大觀進士退居於鉛山南溪讓

論語解十卷易拾遺二卷懶真子錄二十卷集十五卷

府志 謹案舊志馬永卿傳後次列辛棄疾與名宦傳複今刪併宦績錄

鄭望之字顯道彭城人徙居上饒少有文名靖康初再

使金營累官至吏部侍郎以徽猷閣直學士致仕弟資

之字深道亦居溪南仕至吏部侍郎

明一統志

韓元吉字無咎開封人維之子仕至吏部尙書龍圖閣

學士封潁川公嘗師尹焞得呂祖謙爲婿師友淵源爲諸儒所推重徙居上饒所居之前有湖水號南湖湖南有園築亭竹間號蒼筤與兄元隆俱登甲第卒葬城東所著有愚懃錄周易繫辭等書子琥字仲止號澗泉與趙奉泉同時有詩名稱二泉先生方虛谷詩上饒有二

泉指此

府志

晁謙之字恭祖澶州人渡江親族離散極力收卹因居信州仕宋官敷文閣直學士卒葬鉛山鷲湖子孫因家焉

明一統志

徐兢字明叔南唐騎省都尉鉉之裔仕至刑部郎中善書畫人物瀟灑有園在弋陽縣王洋爲賦真意堂詩會

文清幾爲賦蓮榭詩

府志

謹案徐兢宣和間曾使高麗所著有高麗圖經

趙暘字義若鄭州人世居東里直龍圖閣以提點坑冶鑄錢行提舉江州太平觀來居信州玉山智門寺時左丞相呂忠穆公頤浩以書抵信州守連南夫曰趙義若父子皆士林宿望治封有賢人君子可厚加禮待會義若作亭施舜顯因摘君子字以名之

府志

周聿字德元青州人徙居上饒紹興閒召對陳經綸匡濟策稱旨累官刑戶部侍郎所著有春秋大義易說等

書

明一統志

趙不迂字留臣嘗創書樓於上饒兄不遷字茂嘉後改名不過登進士第爲清湘令嘗立兼濟倉於鉛山天王

寺

府志

尹稽字少稷兗州人博學有文登孝宗朝進士累官殿

中侍御史後遷至右諫議大夫紹興閒僑居懷玉山以  
方名齋徙上饒溪南之太霞宮開軒種竹曾文清以友

直名之

林志

劉進行浙江西安人乾道閒官於饒後解官過信州遂

卜居於永豐之塘墀

永豐縣志

王洋字元渤東牟人仕至起居舍人僑居城之南池與

曾文清幾嘗相倡和

府志

周陞字仲固仕至湖南轉運判官徙居上饒扁所居曰

尚論東萊呂舍人有詩

府志

王傅字巖起蓬萊人嘗居上饒赴淮東提舉呂東萊有

贈行詩

林志

宋授字傳道世居青社徙信州後令豐城知永康權發

遣柳州俱有政績

府志

錢時字子是涪安人幼奇偉不羣讀書不爲世儒之習以易冠漕司旣而絕意科舉究明理學江東提刑袁甫作象山書院招主講席學者興起政事多所裨益著有周易釋傳尙書演義學詩管見春秋大旨四書管見兩

漢筆記蜀阜集冠昏記百行冠冕集

宋史

賈逸祖字元放邯鄲人好古博學寓居鉛山天王寺有半隱齋陸務觀爲之記卒葬東里趙蕃題之曰有宋詩人賈元放墓

府志

元

圖烈圖

原作篤列圖

字彥誠蒙古人父揭南新字教化累功

封忠武侯祥興開鎮信州路得一讖云水打巷邨園永

豐出狀元遂家於永豐之進賢坊生圖烈圖登至順庚

午年蒙古榜進士第一授南臺御史

林志

馮廣字原正上世開化人父曾應任永豐教諭廣隨任

愛其山水靈秀因卜居於學宮之南

府志

明

徐夢麟懷遠人父良弼洪武閒任貴溪令歿於官夢麟  
遂占籍貴溪領永樂戊子科鄉薦官鹽課司提舉

府志

上廣  
信府

周

吳申夫差六世孫長沙王芮父事楚考烈王以諫封春  
申君謫居番陽相傳生芮時五色雲見今餘干有五彩

山林

志



晉

郭璞字景純河東聞喜人少受郭公青囊書九卷遂洞  
五行天文卜筮之術元帝時爲著作佐郎王敦謀逆被  
誅時年四十九追贈宏農太守嘗寓鄱陽縣東一百十  
里有郭璞山譔有洞林京費諸家要最新林卜韻注釋  
爾雅三蒼方言穆天子傳山海經等書

府志

唐

歐陽詢潭州人唐太宗時拜太子率更令有一帖云年  
二十餘至鄱陽縣喜其地沃土平眾士往往湊聚僑寓  
甚久

明一  
統志

劉長卿字文房河閒人開元進士至德中爲監察御史  
以檢校祠部員外郎爲轉運使判官知淮南鄂岳轉運

留後鄂岳觀察使吳仲孺誣奏貶潘州南邑尉有爲之  
辨者除睦州司馬終隨州刺史集十卷內有餘干夜宴  
歸弋陽山居登餘干古縣城與諸姪宴餘干後溪同姜  
澹題裴式微餘干東齋負謫後登干越亭諸詩府志

盧綸字允言河中蒲人避天寶亂客鄱陽大厯初數舉  
進士不第元載取綸文以進補閬鄉尉累遷監察御史  
輒稱疾去坐與王縉善久不調渾瑊鎮河中辟元帥判  
官累遷檢校戶部郎中嘗朝京師是時舅韋渠牟得幸  
德宗表其才召見禁中有所作輒使廣和異日問渠牟  
盧綸李益何在答曰綸從渾瑊在河中驛召之會卒唐書

宋

葉似珪歛人皇祐閒由文學舉歷官戶部郎以詩餞唐

介有一封遠謫君恩重萬里遙瞻玉殿寒之句忤執政  
意黜尹建陽再黜爲德興丞樂其風土之淳遂家焉

君

宏西江  
詩話

顧臨字子敦會稽人通經學長於訓詁皇祐中舉說書  
科爲國子監直講遷館閣校勘同知禮院熙甯初神宗  
以臨喜論兵詔編武經要略出權湖南轉運判官提舉  
常平議事戾執政意罷歸元祐二年擢給事中拜天章  
閣待制河北都轉運使歷刑兵吏三部侍郎兼侍讀爲  
翰林學士紹聖初以龍圖閣學士知定州徙應天河南  
府忌者指爲黨人斥饒州居住卒

宋史

蘇昞字季明武功人素性純茂強學篤志從張載學最  
久後見二程復師事以卒其業元祐末呂大中以布衣

薦爲太常博士坐元符中上書言事入邪籍編管饒州

卒宏簡錄

汪廷直字從正婺源人政和二年登第進屯田員外郎

未拜命卒寓居樂安龍亭尙書程瑀表其墓

府志

辛次膺字起季萊州人幼孤從母依外氏王聖美於丹徒俊慧力學日誦千言甫冠登政和二年進士第歷官爲單父丞值山東亂舉室南渡寓居浮梁縣之最高山

府志

鄭戩其先大梁人父肇戶部侍郎從高宗南渡徙居金陵戩官饒州通判因家焉明江淮幕府參贊倫號環谷野人者戩七世孫

天台林右集

薛仁輔字汝弼河東人紹興閒官大理少卿時秦檜忌

岳飛坐以偏撓不奉詔下獄獄成仁輔不署奏牘且明  
飛無罪檜怒諷御史劾之編管遇赦量移饒州卜居樂  
平之安巷今薛家塘卽其遺址

林志謹案舊志薛仁輔後次列朱子今入宦

績錄

趙礪老字涓師東平人從范石湖使金虜丞相亦薦之  
擢同知臨安坐殿司招兵事謫饒州遂家焉歷官工部  
侍郎撰拙庵雜著三十卷外集四卷

府志

元

張翥字仲舉晉甯人其父爲吏從征江南調饒州安仁  
縣典史翥少時豪放不羈好蹴鞠喜音樂父以爲憂翥  
一日翻然易業閉門讀書受業於李存存家安仁江東  
大儒也翥從之游道德性命之說多所研究至元末傅

嚴薦爲國子助教尋退居淮東會朝廷修遼金宋三史起爲翰林國史編修官史成歷遷河南行省平章政事翰林院學士承旨致仕卒

元史

明

吳璋字廷用蘇州吳江人年十一喪父依母陸氏以居永樂閒詔選天下節婦之賢者籍送內宮教刺繡陸以年例當行宣德閒靖王出之封國韶州後改饒州陸皆從璋棄家往來二藩閒屢啟求見不允母子不相知者二十五年璋哀痛誓必見母正統十二年冒死求見嗣封康王憐而許之入見母而母已病篤不能言矣璋傍徨無計焚香籲天刲股作糜母啖之遂醒母子抱持以泣王聞而益閔焉召賜金帛獎諭而遣之璋遂奉母去

饒卒於道匍匐扶輓歸葬先墓一時士大夫哀其志作

吳孝子傳

府志

潘一諤字茹虛福建惠安人萬曆辛卯鄉薦官淮藩長  
史勤學好問卽居宅爲講學之所名里仁社故藩涵玉  
創菁莪書院以延禮之寓饒二十餘年卒於官年七十  
二著有日錄講義

府志 以饒州府

漢

巖下老人不知何許人亦不詳其姓字武帝南巡狩過  
彭蠡詔舉逸民時老人龐眉皓髮處於巖下左右強以  
應詔老人曰堯仁如天孤雲自飛一水一石臣之樂也  
帝曰卿不願仕乎曰簪纓搢笏束身王朝其如舊山谿  
之雲何帝嘉其志禮而遣之

林志

隋

虞綽字士裕餘姚人煬帝時爲學士父經宰建昌因家

焉

府志

唐 南唐附

司馬宅相字元陽河南人齊愍王之後隋召爲學士唐

遷太子洗馬子悌擢進士惇歷山陰令嘗僑居南康府志

黃鳳麟其先江夏人徙家建昌好學能文以德行稱舉

進士累遷侍御史比部員外郎著有文集十卷明一統志

符載字厚之蜀人有奇才隱居廬山五老峯下聚書萬

卷不爲章句學貞元中李巽觀察江西薦其才授奉禮

郎爲南昌軍副使繼辟西川章舉掌書記澤潞邠士美

參謀歷協律郎監察御史元和中段文昌志其墓豫章書



元集虛河南人貞元元和閒避地來居廬山相辭澗白

居易訪之題其亭廬山志

徐凝睦州人元和中官至侍郎常居廬山題咏甚多廬山志

志

李涉字清之洛陽人與弟渤偕隱廬山白鹿洞涉憲宗

時為太子通事舍人歷官博士渤後徙少室山寶歷中

官江州刺史白鹿洞志

劉軻徐之沛縣人天寶之亂隱居廬山萬杉寺與隱士

茅君游元和末登進士官殿中侍御史史館修撰終洛

州刺史著有翼孟豢龍雜文等書豫章書

楊於陵字達夫本太尉震之後年始六歲閒關至江右

長有奇志十八擢進士節度使韓滉以女妻之滉居宰

相於陵避親退廬建昌以文書自娛穆宗朝官終戶部  
尚書封宏農郡公以左僕射致仕卒年七十八諡貞孝

新唐書

楊衡元和中詩人隱居廬山人有竊衡詩而登第者後  
衡及第見其人怒曰一一鶴聲飛上天之句尙在邪其  
人遜謝曰此句知兄甚惜不敢竊之衡莞爾曰猶可恕

也

唐詩紀事

胡份

豫章書作玠

不知何許人常隱廬山苦吟工詩與李騰

友善騰廉問江西弓旌不至

唐詩紀事

何乾曜不知何許人仕爲侍郎後挂冠隱廬山稱匡麓

道人卒葬鶴鳴峯之遷鶯谷

廬山志

鄭元素華原人少習詩禮避亂南遊隱居廬山青牛谷

高臥四十餘年採薇食蕨絃歌自若構椽翦茅於舍後  
會集古書至千餘卷

南唐書

史虛白字畏名山東人南游廬山以詩酒自娛元宗卽  
位韓熙載薦之召見問爲治之理虛白曰臣草野之人  
漁釣而已邦國大計不敢預知因醉溺於殿陛元宗曰

真處士也賜田遣還

南唐書

伍喬廬江人性嗜學以淮人無出己右者遂渡江居廬  
山國學一夕見人掌自牖隙入署讀易二字忽不見喬  
大嘆異輒取易讀之探索精微越數年應進士舉及試  
盡八卦賦齋後望鍾山詩榜出喬中第一仕至考功員  
外郎卒有集一卷行世

十國春秋

陳貺閩人性沈澹志操古朴而不苟於仕進一臥廬山

三十年學者多師事焉元宗以幣聘之布裘鹿鞞進止  
閑肆因獻景陽臺懷古詩元宗稱善欲授以官賦辭不  
受賜粟帛遣歸舊隱卒年七十

南唐書

江爲其先宋州人避亂建陽遂爲建陽人遊廬山白鹿  
洞師事處士陳貺居二十年有風人之體時金陵初復  
唐制以進士取人爲有題白鹿寺詩云吟登蕭寺旃檀  
閣醉倚王家玳瑁筵元宗南遷駐於寺見其詩稱善久  
之爲繇是肆傲自謂俯拾青紫乃詣金陵求舉屢黜於  
有司欲束書亡越會同謀者上變按得其狀伏罪

南唐書

孟貫字一之建安人少好學嘗遊廬山下居其下以禮

義文章節儉爲當時師範人稱孟夫子仕周爲大夫

林志

宋

楊徽之字仲猷建州浦城人南唐時讀書廬山白鹿洞後仕宋爲諫議大夫遷翰林學士拜禮部侍郎善吟詠太宗嘗選其詩十聯書於御屏故梁周翰詩云誰似金華楊學士十聯詩在御屏風景祐二年贈太子太師謚文莊祀白鹿洞

白鹿洞志

荆齋宣城人家貧好學讀書白鹿洞爲學精敏以文章稱太平興國五年進士官至殿中丞歸隱廬山與諸葛澆廬絳號廬山三友

白鹿洞志

馮京字當世其先自河朔徙鄂有奇志因父調南康守與兄元隨侍至幽邃庵愛其幽絕僧仁監留止讀書未幾擢第今幽邃庵古松乃京手植也

廬山紀事

明起不知何許人初爲白鹿洞主掌教授學徒數百人

時知江州周述上言學徒甚盛請賜九經使之肄習後

遷蔡州褒信縣簿

林志

蘇庠字養直丹陽人喜賦咏精翰墨卜築廬山以琴書自娛與脩水李彭齊名世稱蘇李養直父伯固從東坡遊養直屬玉雙飛水滿塘詞見賞於坡稱爲吾家養直

廬山

紀事

崔嘉彥字子虛少有大志壯歲避地巴東三峽閒道下吳越曾以耕戰策干故相趙忠簡會去相不果行自是絕迹匡山得西原庵故址築室居焉耕田種藥以自給年逾七十神明不衰

朱子集

林擇之字用中閩人從朱子遊最久朱子守南康擇之來講學於白鹿洞

白鹿洞志

薛溉右補闕登之後號書倉爲南海書記秩滿入廬山築室居之扁曰薛處士山堂後起爲諫議大夫未幾復歸山題舊隱壁曰重來閒院靜喜對故山青時服其文

雅廬山

紀事

周紫芝字少隱宣城人家貧力學年六十一始以廷對第三歷右司員外郎出知興國軍秩滿乞祠隱廬山終

焉

興國志

謝之良字子基開封人避兵廬山慕周朱之風遂家焉事母克孝篤於友愛早領鄉貢以子登科遂棄舉業專心理學號後巖處士官至承議郎致仕賜緋魚袋累贈太師加封周國公著有綱常類監傳世

林志以南  
上南康府

漢

司馬遷龍門人十歲誦古文二十而南遊登廬山觀禹

疏九江史記

晉

高惺廣陵人少孤事母以孝聞年十三值歲饑惺菜蔬不饜每致甘肥於母撫幼弟以友愛稱寓居江州刺史華軼辟爲西曹書佐及軼敗惺藏匿軼子經年會赦乃出元帝嘉而宥之以爲參軍至丹陽尹光祿大夫封建

昌伯

晉書

周邵字子南與南陽翟湯隱於廬山庾亮臨江州聞翟周之風束帶躡履而詣焉邵聞庾至轉避之亮復密往值邵彈鳥於林因前與語還便云此人可起卽拔爲鎮蠻護軍西陽太守亮與邵書云西陽一郡戶口差實非



履道真純何以鎮其流遁詢之朝野僉曰足下今具上

表請足下臨之無讓

尋陽記

劉澄之字仲思彭城人漢楚元王之後妙善莊老旁通百氏初爲府參軍性好佛理乃之廬山自託遠公遂於西林湖北別立禪坊養志安貧精研元理劉裕旌其號曰遺民義熙六年卒

豫章書

宋

宗炳字少文南陽涅陽人性至孝居喪過禮爲鄉里所稱刺史殷仲堪桓元並辟主簿舉秀才不就宋高祖辟爲主簿不起問其故答曰棲邱飲谷三十餘年高祖善其對妙善琴書精於言理每遊山水往輒忘歸乃下入廬山就釋慧遠考尋文義兄臧爲南平太守偁與俱還

乃於江陵三湖立宅凡所遊履皆圖之於室謂人曰撫  
琴動操欲令眾山皆響元嘉二十四年卒時年六十九

南史

齊

宗測字敬微少文之孫少靜退不樂人閒永明三年詔  
徵太子舍人不就欲遊名山乃寫祖少文所作向子平  
圖於壁上長子賓宦在都知父此旨便求祿還爲南郡  
丞付以家事遂往廬山止祖少文舊宅魚復侯子響爲  
江州厚遺贈遺測曰少有狂疾尋山採藥遠來至此量  
腹而進松朮度形而衣薜蘿淡然已足豈容當此橫施  
建武二年徵爲司徒主簿不就卒

南史

梁

劉慧斐字宣文彭城人父元直淮南太守慧斐少博學能屬文起家梁安成王法曹行參軍嘗還都途經尋陽游於匡山遇處士張孝秀相得甚歡遂有終焉之志因不仕居東林寺又於山北構園一所號曰離垢園人稱

離垢先生

豫章書

張孝秀字文逸南陽人徙居尋陽爲建安王別駕棄官入廬山隱居東林寺側孝秀性通率不好浮華嘗冠縠皮巾躡蒲履手執并闔皮麈尾服寒食散盛冬臥於石上博涉羣書專精釋典普通三年卒梁簡文甚傷悼焉與劉慧斐書述其貞白云

廬山志

陳

張正見字見頤清河東武城人梁元帝立拜通直散騎

侍郎遷彭澤令屬梁季喪亂避地於匡俗山時焦僧度擁眾自保遣使請交正見懼之遜辭延納然以禮法自持僧度亦雅相敬憚高祖受禪詔正見還都除鎮東鄆陽王府墨曹行參軍兼衡陽王府長史歷宜都王限外記室撰史著士帶尋陽郡丞累遷尚書度支郎通直散騎侍郎著士如故太建中卒時年四十九有集十四卷

陳書

唐

李白字太白十歲通詩書賀知章稱爲謫仙薦於元宗召見金鑾論當世事奏誦一篇帝賜食親爲調羹命供奉翰林祿山反轉側宿松匡廬閒永王璘辟爲府僚璘起兵逃還彭澤及璘敗當誅因嘗救郭子儀犯法至是

子儀請解官以贖得長流夜郎赦還尋陽復坐事下獄  
會宋若思將兵往河南道尋陽釋其囚辟爲參謀未幾  
辭職依常塗令李陽冰悅謝家青山將終焉代宗立召  
爲左拾遺已卒年六十餘

宏簡  
錄

元結字次山河南人後魏常山王遵十五代孫少不羈  
十七乃折節向學天寶十二載舉進士天下兵興入猗  
玗洞始稱猗玗子後家瀼濱乃自稱浪士久之拜道州  
刺史進授營管經略使加左金吾衛將軍卒年五十贈

禮部侍郎

唐書

李華字遐叔趙州贊皇人天寶十一載遷監察御史安  
祿山反上誅守之策皆留不報元宗入蜀百官解竄華  
母在鄴欲閒行輦母以逃爲盜所得僞署鳳閣舍人賊

平貶杭州司戶參軍華自傷踐危亂不能完節又不能  
安親欲終養而母亡遂屏居江南上元中以左補闕司  
封員外郎召之華喟然曰烏有隳節危親欲荷天子寵  
乎稱疾不拜李峴領選江南表置幕府臥疾江州其送  
李侍御序有云方理舟潯陽追迹幽人雖病痼齒衰而  
神王傾頽之中齊榮辱一視聽是非哀樂無自入矣

書

豫章

吳筠字貞節華州華陰人通經義美文辭舉進士不第  
性高鯁不耐沈浮於時愛廬山之勝卜居於茲著廬山  
雲液泉賦大厯十三年卒弟子私謚曰宗元先生

豫章書

蕭存字伯誠蕭穎士子仕爲金部員外郎以惡裴延齡  
棄官歸廬山子東爲邕南從事女嫁柳中庸韓文公愈

少時爲存所知其後愈自袁州入爲祭酒經廬山過其  
居存諸子皆凋謝惟女在江州爲尼愈題其舊堂曰中  
郎有女能傳業伯道無兒可保家偶到匡山曾住處幾

行哀淚落煙霞

廬山紀事

侯高字元覽上谷人少爲道士學黃老鍊氣保形之術  
居廬山號華陽居士與孟郊東野韓愈退之李渤潛之  
獨孤朗用晦李翱習之相往來汴州亂兵士殺留後陸  
長源東取劉逸淮乃作弔汴州文投之大川以訴貞元  
十五年李翱遇高於蘇州出其辭以示翱翱謂孟東野  
曰誠之至者必上通上帝聞之劉逸淮其將不久後數  
月逸淮竟死達撫爲楚州起攝盱眙祭酒李公遜刺衢  
州請治信安其觀察浙東又宰于剡三縣皆有政不幸

得心疾留其子狗兒於李翱家而歸廬山不到卒於江

西文苑  
英華

楊收字藏之馮翊人讀書廬山有道者謂之曰子貌可  
仙如仕卽至宰相能舍所事從吾游乎收時方覬進取  
謝不能道者遂去不見固余  
錄

後周 南唐 堦

歐陽敷字華道鄧州南陽人後漢隱帝間爲中書舍人  
繼秉天雄軍節鉞周太祖時爲光祿大夫檢校尙書侍  
郎因兵亂避居九華山後又徙隱彭澤筠塘澗化閒卒  
遂葬於其地子煜登咸平進士歷官常侍以父墓在縣  
遂家焉府志

孫晟初名鳳又名忌密州人好學有文辭尤長於詩少



爲道士居廬山簡寂宮常畫唐詩人賈島像置於屋壁  
朝夕事之簡寂宮道士惡晟以爲妖驅出之乃儒服北  
之趙魏謁唐莊宗於鎮州莊宗以晟爲著作佐郎天成  
中奔吳爲吳相後使於周世宗召問江西事不對殺之

豫章書

宋

宋庠字公序安州安陸人後徙開封之雍邱父杞嘗爲  
九江掾與其妻鍾禱於廬阜鍾夢道士授以書曰以遺  
爾子視之小戴禮也已而庠生他日見許真君像卽夢  
中見者庠天聖初舉進士開封試禮部皆第一歷官司

空謚元獻

豫章書

劉廷式字得之齊州人娶瞽女旣喪不復娶蘇軾深重

之後監太平觀遂老於廬山

府志

柳勅字公渙其先河東人徙居廣信登元符進士任河南參軍時徽宗惑於靈素誅求百姓勅上疏不報歎曰主上崇虛棄實宋道去矣吾既不能正君可負所學而羈糜爵祿乎竟解組南旋道經湖口訪陶元亮故址遂

卜居焉

府志

張所青州人登進士歷官監察御史直言詆黃潛善責鳳州團練副使江州安置

宏簡錄

李若谷河北人高宗時罷參政或曰胡不效楊原仲之泣若谷笑曰卽捶死淚亦不出秦檜聞之大怒謫居江

州

林志

王庶字子尚慶陽人以不主和議七疏乞免乃以資政

殿學士知潭州歸至九江被命奪職徙家居焉府志

元

黃儀可其先長安人唐末遠祖舒藝知資州內江縣卒葬焉子孫遂爲資州人宋初十世祖延節爲大理評事兼監察御史四世祖拂與二兄播揆同年登進士蜀人榮之儀可旣累舉不第隨兄驥子官九江蜀亂不能歸因家焉生子澤卽楚望也

元史 謹案舊志黃澤列傳賢今改列傳

黃德隆山東人江州萬戶管軍尙節概元末城陷與總

管李黼同死子孫因世居高良山

林志

趙汭字子常休甯人姿稟卓絕初讀朱子四書多所疑難乃盡取朱子書讀之聞九江黃澤有學行往從之游澤之學以精思自悟爲主其教人引而不發汭一再登

門乃得六經疑義千餘條以歸已復往留二歲得口授  
六十四卦大義與學春秋之要後復從臨川虞集游聞  
吳澄之學乃築東山精舍讀書著述其中學者稱東山

先生

白志

明

桑喬字子木揚州人爲御史嘉靖辛酉謫九江居廬山

北林隱庵凡諸名勝無不歷覽所著有廬山紀事

豫章書

邢懋學黃梅人進士懋敬之弟遷居九江博學高才舉

孝廉不願計偕創長松館延紫柏大師與江中明林半

偈姪士俊等效遠公淨業故事歸宗寺賴以復興

府志

陳昂字爾瞻莆田人隆萬閒避倭難攜妻子客南昌旋

愛匡廬旅於九江琵琶亭側以織草履爲業得錢輒沽

酒閒或爲人卜凡匡廬幽險處莫不登覽後卒於金陵  
有白雲先生詩集

府志

王一翥字子雲黃岡人中舉後隱居德化之吳障山茅  
屋三閒蕭條高寄博學逸才詩文皆有天然之趣子材  
而天卽埋山下傲延陵季子之風人呼爲楚狂士

府志以

上九  
江府

宋

程顥字伯淳頤字正叔河南人父珣宋仁宗慶厯甲申  
知興國縣事越二年丙戌通判南安軍時周敦頤任司  
理參軍因與爲友令二子師事之每令尋孔顏樂處宋  
史傳稱顥自十五六時與弟頤聞汝南周敦頤論學遂  
厭科舉之習慨然有志求道顥仕至太子中允監察御史

史裏行後謫汝州監稅哲宗召爲宗正丞未行而卒年五十四文彥博題其墓曰明道先生嘉定閒諡曰純公頤官至祕書省校書郎卒年七十五學者稱伊川先生

諡曰正公

豫章書

江公望字民表睦州人舉進士建中靖國元年由太常博士拜左司諫內苑畜珍禽異獸力言非初政所宜蔡正仙府史以語言疑似成獄公望極言論救出知淮陽軍未幾召爲左司員外郎以直龍圖閣知壽州蔡京爲政編管南安軍遇赦還家建炎中贈右諫議大夫宋史張九成字子韶其先開封人徙居錢塘趙鼎薦爲太常博士改著作郎除宗正少卿權禮部侍郎秦檜主和議九成上陳十事檜惡其立異謫守邵州檜黨何鑄劾以

傾附趙鼎詹大方復論與偕宗杲謗訕朝政謫居南安  
軍十四年益勤學問每執書就明倚立庭輒歲久雙趺  
隱然檜死起知温州乞祠歸卒寶慶初贈太師崇國公

諡文忠

宏簡  
錄

解潛藍田人爲邊帥以中丞李文會言其本趙鼎客不  
從和議謫居南安凡十九年疾革張九成往視之潛泣  
曰生平仗忠義誓與鹵死爲秦檜所斥此心惟天知之  
九成曰無愧此心足矣何必人知卽豁然而逝

明一  
統志

鄭公憶紹興閒由資政殿學士謫居南安

府志

劉黻字聲伯溫州樂清人淳祐中丁大全劾奏丞相董  
槐去國將奪其位時黻爲太學生伏闕上書忤執政送  
南安軍安置歸別其母母曰爲臣死忠以直被貶分也

速行敝至南安盡取濂洛諸書摘其精要語輯成書十卷名曰濂洛論語及大全貶敝還太學累官至試吏部尚書以丁艱歸久不起及文天祥勤王徵之慨然赴難尋以疾卒始終大節卓然著有蒙川集問梅集及詩銘若干卷傳於世

府志

明

陳獻章字公甫新會人舉正統十二年鄉試再上禮部不第從吳與弼講學居半載乃歸廣東布政使彭韶總督朱英交薦召至京令就試吏部辭疾不赴疏乞終養授翰林院檢討以歸至南安與知府張弼日相賡和弼疑其拜官與與弼不同對曰吳先生以布衣爲石亨所薦故不受職獻章以聽選國子生疏陳始終願仕故不



敢僞辭釣虛譽自是屢薦卒不起萬厯初從祀孔廟追

諡文恭

白志以  
上南安府

唐

張說字道濟洛陽人長安中爲鳳閣舍人張易之誣陷魏元忠援說爲助說廷對元忠無不順言忤武后旨謫

嶺南留虔地寓紫極宮爲撰碑文

府志

李嶠字巨山贊皇人舉制策甲科封趙國公特進同中書門下三品中宗崩嶠嘗密請相王諸子不宜留京師及元宗嗣位獲其表宮中張說言嶠誠慳逆順然爲當時謀吠非其主不可追罪天子亦顧數更赦遂免聽隨子虔州刺史暢之官嶠富才思爲文章宿老一時學者

取法焉

唐書

宋

包拯字希仁合肥人過虔師事邑人陳晦之於崆峒山

中

贛縣志

蘇洵字明允眉山人嘗南遊入虔與贛人鍾斐交洵不喜飲酒每爲設醴其後洵子軾轍過虔必造訪斐又與斐子志仁志行志遠敦通家之好

府志

呂倚字夢得維揚人少有聲場屋善屬對好收古今帖贈贈不偶老始以恩補瑞金簿致仕貧無以歸年八十餘惟有一女嫁贛人因居焉與王禹玉有舊元豐間餉錢二萬酒十壺倚作啟致謝句中用白水真人青州從事禹玉極歎賞之東坡過虔遺之以詩

潘子真詩話

楊方字子直長汀人隆興初登第嘗遊崇安謁朱子面

受教旨後除編修官祕書郎時禁僞學坐朱子故罷僑居贛州閉門讀書自號淡軒嘉定初召起累官直寶謨閣廣西提刑卒於象州宋時建祠與東坡並祀

府志

元

滕賓字玉霄雒陽人仁宗英宗閒官翰林嘗客遊興國至治辛酉爲監邑呼圖壁

原作忽都必

撰拯溺碑記又有題

令公巖十景詩

繳水志林

明

邱濬字仲深瓊山人屢駐鬱孤臺厯游勝境題詠甚多天啟閒贛令邱爾懿卽其冢孫

贛縣志

林珽字質賢閩縣諸生少負氣多材略與郭維經萬元吉楊廷麟楊文薦姚奇孕同死節於贛州城

福建通志

國朝

鮑夔生字子韶歙縣人父叔裔崇禎末以孝廉令廣之始興遭亂棄官避地贛縣夔生少從父兵閒嫻兵略意氣豪上所論交皆當世知名士縱游吳越燕齊閒丁巳從某都督征吉安戊午從尙將軍之孝勦厓石及平閩汀諸賊壘後先以儒服借箸軍門或談言微中脫善類於阨士論歸之卒子孫遂籍於贛府志上贛州府以

國朝

吳參字竟魯貴池人父尊周崇禎末武進士遜迹爲頭陀或傳其在南嶽參往省未得見南昌彭士望與尊周有舊參喪偶子正名纔數齡託士望鞠之參變姓名爲姬適訪求幾半天下終不得遇乃從士望於甯都躬耕

冠石以父出亡終身不再娶有志理學著裏言一編晚  
之杭與河渚三君子應嗣寅沈甸華陳際叔交相與談  
學乙卯卒於杭河渚諸子爲具含殮遂卜葬焉正名廬  
墓側三年復歸甯都居金精洞之篁竹峯刻苦篤行以  
文學爲李騰蛟魏禮高坐弟子年七十餘卒著有廓言

吳子七篇原地印浦堂詩文集

州志

俞塞字吾體歙縣人少讀書講道不應舉鄉邦以學行  
宗之崇禎末棄家出游抵石城住東門城樓戍卒憎其  
哦詩聲卻之乃僦居山寺董令應譽聞而賓禮之留之  
不可餽以金弗受惟詩文往還邑中人士多就教者後

入閩海不知所終

石城縣志

柴紹炳字虎臣浙江仁和人少奇敏博學工詩中年潛

心關閩濂洛之學嘗從父任過甯都與曾燦魏禧兄弟  
遊講學易堂以躬行實踐爲歸結廬白茅峯有終焉之  
志後以父卒官扶藪歸里

州志 仁和縣志  
以上甯都州

江西通志卷一百七十七